



Glygge-Zyttig vo de  
JOKER WAGGIS

Usgoob 2 - im Juni 2012

## Events

Grillplausch 2012

SYTTE 3



## Unter der Lupe

Der Galli

SYTTE 2



## Wettbewäärb

S'git ebbis z'gwinne

SYTTE 2



# Dooti Kultur ?!?

## D'JOKER WAGGIS an der Basler Fasnacht 2012 ...



Fondation Culture Morte - d'JOKER WAGGIS ganz in schwarz uff der Route unterwägs ...  
Bild hinte: Busi, Galli, Fäb, Stephan, Tartan. Bild voorne: Beni, Patrick, Mathias (v.l.n.r.)

“S'glemmt“ – so het s'Motto vo der Basler Fasnacht 2012 ghaisse. Und au bi de JOKER WAGGIS het's kurz vor de drey scheenschte Dääg pletzlich glemmt. Wenn ai Wuche vor der Fasnacht uff aimol der Draggdoor-Faarer absait und zwai Dääg vor em Moorgestraich au der Draggdoor fascht der Gaischt uffgää will, kunnt me trotz ere guete Vorberaitig nomol gheerig ins Schwitze.

Es het nach eme schlächte Scheerz deent, wo der Patrick ai Wuche vor em Moorgestraich mäldet, dass der Muu – unsere bishäärige Draggdoor-Faarer – kurzfristig absait. Doch leider isch es Ärnst gsi! Und so hän sich d'JOKER WAGGIS nach neue Draggdoor-Faarer deerfe ummeluege. Gott sei Dangg isch das nit allzu schwierig gsi und rasch

hän sich 2 Faarer bereit ergläärt, wo sich dääre haiggle Uusefoorderig gstellt hän und je ai Noomidaag gfaare sin.

Bim Draggdoor isch es am Samschtig vor der Fasnacht denn doch e weeneli heisser gsi. Tradizionell wird däa am sog. Draggdoor-Samschtig um d'Mittagszyt bim Buur in Sissach abghoolt und dernoo goot's zem Verschaale nach Birsfælde. Doch bi der Aakunft in Birsfælde het sich uusegestellt, dass ai Vorderpneu laufend Luft verliert. Will Pumpe kai Wäärt gha het, und e Fligg au nit 100%ig sicher isch, het sich der Patrick uff d'Suechi noch eme neue Schluuch gmacht – und zoobe spoot denn au gfunde.

So het sich doch no alles zem Guete gwändet und d'JOKER WAGGIS sin am Fasnachts-Mänig

WYTER SYTTE 2

## FORTSETZIG

planmässig um 13:00 Uhr am Wettstaiplatz parat gsi, zem mit de Familie, Frinde und Passiv-Mitgliider uff d'Fasnacht 2012 aazstosse.

Um 13:30 Uhr isch es denn uff d'Route gange. Zem erschte Mol mit gschlossenem Waage und feschem Uffbau, isch es fir alli Betailigte am Aafang e weeneli ungewoont gsi. Doch me het sich relativ schnäll dra gweent - und zwischeduure het me hinter aim vo de "Bilder" e Momänt kenne verschnuufe. Doch s'allerbeschte isch gsi, dass me nach 3 Joor ooni, ändlig wieder Mol e richtige Waggis het deerfe usspiile. Und ganz in schwarz het das nadyrlig richtig gfirchig usgeh. Wenn uff aimol e "Bild" uffgrollt und e schwarze Waggis derhinter ufftaucht isch, sin d'Lyt am Stroosserand allewyyl e Schritt zrug gwiche. Generell isch s'Sujet "Fondation Culture Morte" rächt guet aakoo. Au s'Comité het nit schlächt

gstuunt, wo der Unterschied vo dooter und lääbiger Kultur sichtbar worde isch. Nach em Cortège isch es denn zum Nachtässe ins Cenrto gange. Und speeter het me der Fasnachts-Mäntig bi aagnääm warme Temperature usklinge lo.

Am Fasnachts-Zyschtig sin gwissi JOKER wieder mit de Binggis unterwägs gsi. Grad im Aaschluss hän sich au die räschtlige JOKER uff em Rümelinsplatz yygfunde zem gmainsame Raclette-Plausch. Das isch zwar ganz e spontani Ydee gsi, isch aber bi alle JOKER sehr guet aakoo. Dernoo isch s'Binggis-Wäägeli zem Bar-Wäägeli umfunggziooniert worde. Denn au in däm Joor sin d'JOKER WAGGIS wieder an der Birsig-Sinfonie parat gstande, um der Durscht vo de Schauluschtige z'lesche. Mit eme fascht leere Bar-Wäägeli isch es denn lang nach Mitternacht an Noodelbärg gange, wo s'Bar-Wäägeli bis noch der Fasnacht

sicher deponiert worde isch.



2 Waggis im Diensch: Stephan und Busi

Am Fasnachts-Mittwuch isch denn no der zwaiti Cortège aagstande. Au an däm Daag sin d'Temperature ähnlig hoch und s'Wätter genauso scheen gsi. D'Stimmig isch super gsi wie am Fasnachts-Mäntig, doch uff em Waage vo de JOKER WAGGIS sin einzeln "Bilder" ainewäg eifers unte bliibe – die vergangene Dääg sin nit spurlos verby gange. Doch nadyrlig hän alli JOKER uff d'Zään bysse und bis zem Änd duurehalte.

## Unter der Lupe: Der Galli

In dääre Rubrigg wird allewyyl ai JOKER genauer voorgstellt. Diesmol näme miir der Galli unter d'Lupe.

**72stunde: Wie alt bisch Du?**  
Galli: 32.

**72stunde: Wo bisch Du diheim?**  
Galli: Syt bald aim Joor bi ich in Minchestai diheim.

**72stunde: Was machsch brueflig?**  
Galli: Ich schaff syt 10 Joor als Chemikant.

**72szunde: Was machsch Du in Diiner Freizyt?**

Galli: Ich spii Dart und amme Squash. Sunscht bi ich gäärn im Garte oder aifach dusse.

**72stunde: Syt wenn bisch Du bi de JOKER WAGGIS?**

Galli: Syt der Fasnacht 2008 bi ich Mitgliid vo de JOKER WAGGIS.

**72stunde: Wie bisch Du zue de JOKER WAGGIS gstoosse?**

Galli: Duur s'Dart ha ich der Stephan scho länger kennt. Er het mi denn Mol gfroogt, ob ich wäärend der Pausierig vom Mathias yspringe wett. Und scho isch es passiert gsi ... s'Fasnachts-Fieber het mi paggt.



**72stunde: Was isch Dii spezieli Funggzioon bi de JOKER WAGGIS?**

Galli: Waagebau und Buttons.

**72stunde: Weeles isch Dii scheenschi Fasnacht gsi?**

Galli: Mii erschti Fasnacht 2008 isch sicher seer speziell gsi ... scho vom Sujet häär.

**72stunde: Und weeles isch Dii scheenschts Erlääbnis mit de JOKER WAGGIS gsi?**

Galli: Doo git's e mänggs. Aber ich muess sage, die baide Muttezer

Banndääg ha ich super gfunde. Es git bi de JOKER WAGGIS au diversi Aggtividääte nääbe der Fasnacht ... au wenn's sich am Schluss doch allewyyl um das aine Thema draht!

**72stunde: Was sin Diini Wunsch fir d'Zuekunft bi de JOKER WAGGIS?**

Galli: No vyyli Joor mit dääre gladde Sieche Fasnacht z'mache und mi freue z'deerfe, wenn e Träff, Waagebau, oder äänligs aastoot ...

## Wettbewäärb ...

Jetz git's wieder ebbis z'gwinne! D'JOKER WAGGIS bestene hit us 8 Aggtive. Das isch aber nit immer so gsi.

Wäär weiss, in weelem Joor mir JOKER WAGGIS zum erschte Mol zu acht am Cortège aazdräffe gsi sin, ka e Konsumazioons-Guetschynn iiber 15 Frangge gwinne - yzleese an unserer Bar an der Muttezer Fasnacht am Samschtig, 23. Hoornig 2013.

Antwoorte bitte bis speeteschtens 25. Juli 2012 an:

[redaggzioon@joker-waggis.ch](mailto:redaggzioon@joker-waggis.ch)

# JOKER WAGGIS-Grillplausch 2012

Au in däm Joor findet wieder e JOKER WAGGIS-Grillplausch statt. Gweenlig isch dää zwar im Juni terminiert, doch wäg der Feussball-Europamaischterschaft hän miir der Grillplausch 2012 kurzerhand uff e Nazioonalfyyrdaag gleegt.

Nach em Fasnachts-Abschluss - der Lämpesitzig - isch es allewyyl e weeneli ruhiger bi de JOKER WAGGIS, bis es im Summer mit em Grillplausch wieder los goot. So isch es au in däm Joor gsi.

Doch so isch fiir aimol sogar d'Vorberaitig vom Grillplausch mee und mee uusegschoobe worde, bis es denn pletzlich knapp woorde isch. Doch wie haisst's soo scheen: "Ende gut - alles gut"! Denn e passende Termin isch zem Schluss no gfunde worde.

So findet am 01. Auguscht 2012 ab 16:00 Uhr der dritt JOKER WAGGIS-Grillplausch statt.

Als Neyerig in däm Joor isch der Usdraagigsoort aber nit im Hinterhof vo der Beggerei Bischoff, sondern e weeneli heecher glääge in der Muttezer Blogghitte. Vo deert us me au e gueti ussicht uff s'Basler Fyyrwärg het.

Nadyrlig sin au unseri Frinde, Bekannte und Passiv-Mitglieder wieder hätzlig yyglaade, dää Oobe mit uns z'verbringe. D'Gedrängg sin wie allewyyl vo de JOKER WAGGIS offeriert. Ebbis fiir uff e Grill isch sälber z'bsoorge.

Miir JOKER WAGGIS freue uns uff e gmietligs Zämmehogge und sage jetz bereits "e Guete" ...



Grillplausch 2011: E gmietlige Oobe isch in unserem Glyggekäller langsam usklunge ...

## Passiv-Mitglied wärde?

JOKER WAGGIS dien miir uns nenne, e Mänge duet uns z Basel kenne.

Mee als 15 Joor - es isch e Hit, faare miir am Cortège mit.

Dien s Fasnachtmache zelebriere, nit numme Stopfe - au Intregiere.

Doch au unterem Joor - s meergt jeede bald, pflääge miir unsere Zämmehalt.

Miir acht miir sin e glatte Huffe, mit uns kasch lache, feschte, suffe ...

Wenn Duu jetz dänggsch: "Jää, das isch Spitze, die Glygge mecht yych unterstizte".

Denn waart nimm z lang und schriib

## Hätzlige Gliggwunsch!

In der Nacht vom Sunntig, 17. Juni uff e Mäntig, 18. Juni 2012 isch unser Passiv-Mitglied, der Ruben, Bappe vomene Bueb worde. Der Glai misst bi der Gebuurt 48 cm, wiegt 3070 gr und loost uff e Name David Alexander.

D'JOKER WAGGIS gratuliere em Ruben ganz hätzlig und winsche ihm, em Glaine und der Mamme alles Gueti!

## Usbligg uff s'Joor 2012

Bereits isch es Summer worde - und bis zur Fasnacht 2013 goot's nit emol mee 8 Monet. Zwar no kai Grund zum nervees wärde, doch Zyt fiir d'JOKER WAGGIS, mit de erschte Fasnachts-Vorberaitige z'staarte.

Zue de wichtigschte Vorberaitige gheert sicher die alljeerligi Garage-Sanierig. Will unseri Garage einigi Joorzäänt uff em Buggel het und drum nimme ganz wasserdicht isch, wird die aimol im Joor general iiberhoolt. Us em gliiche Grund fange miir au allewyyl so frieh wie meeglig mit Waagebau aa.

So stehen zur Zyt scho folgend Date in unserem Terminplan:

**01. Auguscht 2012**  
JOKER WAGGIS-Grillplausch

**ab Auguscht 2012**  
Garage-Sanierig /  
Aafange mit Waagebau

**im Novämber 2012**  
JOKER WAGGIS-Mässbummel

Dii yy, scho bisch als Passiv-Mitglied derby.

Fir 25 Frangge - s isch nit vergäabe, kasch s Faasnachts-Joor mit uns erlääbe!

Aamäldige als Passiv-Mitglied unter:  
[www.joker-waggis.ch](http://www.joker-waggis.ch)  
oder dirägg't bi aim vo uns JOKER WAGGIS.